

ner sur les brisées pour luy en demander vn autre; mais il fut bien estonné quand il vit ce papier tout sain & entier entre les varangues de son canot réchappé du danger; il admiroit cela comme vn prodige, & le racontoit comme vn miracle à ses gens. Estant de retour en son pays, il affembloit tous les iours ses voisins dans vne grande cabane, pendoit ce papier à vne perche, & tous se mettans à l'entour, chantoient ce qu'ils fçauoient de ces Litanies, s'escrians tous à Dieu Chaserindamasinan ayez pitié de nous: Dieu prit plaisir à leur demande; car la maladie qui les affligeoit cessa entierement. Ce pauvre homme reuenant voir nos Peres rapporta ce papier, & puis se retirant l'hyuer dans les bois pour faire sa prouision d'Elan, en demanda vn autre qu'il respectoit en la mesme façon; & comme il ne fçauoit pas encor par cœur les prieres qu'il faut presenter à Dieu, il luy offroi[t] ce papier, & luy difoit avec tous ses gens [44] si nous fçauions ce qui est dans ce papier, nous te le dirions tous; mais puisque nous sommes ignorance, contente toy de nos cœurs, & nous faits misericorde, toy qui est nostre grand Capitaine. Estant par apres de retour vers nos Peres, il leur dit que rien ne luy auoit manqué, & que Dieu l'auoit mis dans l'abondance.

Le Sorcier mesme, dont i'ay parlé cy-deffus, lequel au commencement crioit contre la venuë des femmes Françoises, voyât sa petite fille malade, n'eut point de recours à son art, mais au Baptesme, qu'il procura à son enfant; & la fanté du corps luy estât renduë avec la saincteté de l'ame, ce charlatan ne cessoit de nous preconiser, & nostre doctrine; mais il faisoit comme les cloches qui appellent le monde à l'Eglise, & n'y entrent iamais.